

Furlan a scuele: gnûfs tescj e un cors online pai docents

Eva indenant cence polse la ativitât de ARLeF par sostignî la valorizazion de lenghe furlane inte scuele. Tra lis ultimis iniziatis e je stade la consegne dal materiâl didatic tes scuelis dulà che si insegnen furlan e un cors di formazion online, pai insegnants de scuele primarie, sul ûs de biblioteche didatiche digjitâl di Lenghis-Ladint.

MATERIÂL DIDATIC

Il furlan a scuele lu sielzin plui dal 76% dai gjenitôrs. O fevelin di plui o mancun 40 mil arlêfs des scuelis de infanzie, primariis e secundariis di prin grât che, ogni an, a imparin la lenghe e la culture furlane, une vore dispès cun metodologjîs didatichis di avanguardie. Su la fonde di chescj dâts une vore impuartants, tes ultimis setemanis la ARLeF e à **consegnât materiâl didatic a supuart de ativitât dai docents intai plui di 330 ples scolastics**: «La distribuzion dai materiâi a ducj i Istitûts scolastics dal teritori furlan - al à evidenziât il president de ARLeF, Eros Csilino -, e vûl ufrî un supuart impuartant ae ufierte formative dai docents e duncje stimolâ la creativitât, l'interès e



Di çampe, Renata Chiappino, dirigente dal Istitût comprensif di Feagne, Eros Csilino, president de ARLeF

l'ûs atif de lenghe furlane dai arlêfs». La iniziative e ven daûr de creazion, tal mêis di Març stât, de **“Rêt dai referents pal insegnament de lenghe furlane”**, promovude propit de Agjenzie cun chês di facilitâ la distribuzion smirade di materiâl ludic didatic tes scuelis, ma no dome. Il materiâl didatic consegnât, diversificât daûr dai ciclis scolastics, al è stât prontât par ogni insegnant di furlan su la fonde dal numar dai dâts inviâts, tai mêis passâts, dai stes Istitûts. Cun di plui, al è stât metût a disposizion altri **materiâl dedicât par ogni classe de Scuele de Infanzie**.

LENGHIS.ME - al tache cui 17 di Novembar il cors online

Il cors “L'ûs de biblioteche didatiche digjitâl di Lenghis-Ladint” al è indreçât ai **insegnants de scuele primarie** che a vuelin cognossi e sperimentâ dutis lis potenzialitâts di ûs di chest impuartant imprest informatic pe didatiche de lenghe furlane, taliane e inglese, che cumò al è ancjemò plui siôr di contignûts. Promovût de ARLeF in colaborazion cul Ufici Scolastic Regjonâl, il cors al previôt trê apontaments - **miercus ai 17 e ai 24 di Novembar, e il 1ⁿ di Dicembar, des 17.00 aes 18.30** - tignûts dal professôr Adrian Cescje e di altris membrs de Comission Didatiche Lenghis-Ladint. I prins doi incuintris a mostraran, ançje midiant di simulazions, cemût doprâ i sussidiaris de Biblioteche di Lenghis par percors didatics su argoments di nature leterarie o scientifiche. Il tierç incuintri, invece, al sarà un Focus group, cul intindiment di inviâ un confront su lis esperiencis di ûs di Lenghis-Ladint. **La iscrizion si à di fâ - dentri di miercus ai 10 di Novembar** - a chest link <https://forms.office.com/r/nQABZMSfq2>.

A chei che a parteciparan ai trê apontaments dal cors, ur vignarà dât un atestât di frecuence. Lenghis.me al è realizât dal Claap - Centri di Linguistiche Aplicade “Agnul Pitane”. Il program dal cors al è a disposizion sul sît www.arlef.it. Par informazions, si pues scrivi a scuole@sportelfurlan.eu.

ARLeF AGENZIA REGIONALE DEL FURLAN

USR FVG Ufficio Scolastico Regionale per il Friuli-Venezia Giulia

CORS ONLINE

Lenghis Lingue Languages

Lenghis.me

CORS DI FORMAZION PAI INSEGNANTS CUN ESERCITAZIONS PRATICHIS
L'ûs de biblioteche didatiche digjitâl par insegnâ in 3 lenghis (italian, furlan, inglês) tacant de Scuele Primarie

CORSO DI FORMAZIONE PER GLI INSEGNANTI CON ESERCITAZIONI PRATICHE
L'uso della biblioteca didattica digitale per insegnare in 3 lingue (italiano, friulano, inglese) a cominciare dalla Scuola Primaria

Miercus / Mercoledì 17 e 24/11 e 01/12/2021 orari / orario: 17.00 - 18.30